

**Malaysia terus komited kepada perjanjian perdamaian Bangsamoro**  
**Astro Awani**  
**Ogos 13, 2016**  
**Hilal Azmi**

**KUALA LUMPUR:** Malaysia komited menjadi orang tengah dalam rundingan damai antara Barisan Pembebasan Islam Moro (MILF) dengan Kerajaan Filipina.

Perdana Menteri, Datuk Seri Najib Tun Razak berkata, komitmen itu akan diteruskan sehinggalah keamanan serta kemakmuran dicapai di wilayah terbabit.

Dalam kenyataannya yang dibacakan Timbalan Menteri Pertahanan, Datuk Seri Johari Baharum, Malaysia akan tetap memainkan peranan terbabit dan pada masa sama kekal menghormati kedaulatan Filipina.

"Malaysia kekal komited selagi diperlukan dalam rundingan damai ini.

"Kami tetap hormat kedaulatan Filipina tanpa mencampuri urusan dalaman selaras dengan aspirasi ASEAN.

"Malah, jika ada permintaan, kerajaan akan tetap membantu dengan semangat sebagai kawan serantau dan sebagai sebuah negara jiran," katanya.

Tambah beliau, Malaysia bangga dapat membantu rundingan damai tersebut dan meningkatkan tahap keselamatan dan kestabilan di Mindanao dan rantau ini lebih-lebih lagi apabila konflik puluhan tahun itu telah mengorbankan puluhan ribu nyawa.

Pagi tadi, berlangsung Majlis Perasmian Fasa Pelaksanaan Perjanjian Damai Mindanao, yang dihadiri Penasihat Presiden Filipina Mengenai Proses Damai, Jesus Dureza; Pengerusi MILF, Murad Ebrahim serta Fasilitator Proses Damai Antara Kerajaan Filipina dan MILF, Datuk Tengku Ab Ghafar Tengku Mohamed, di Kuala Lumpur.

Najib berkata beliau bangga dengan perkembangan program dua hari itu, yang menyaksikan pelancaran secara rasmi Fasa Pelaksanaan Perjanjian Komprehensif Berkaitan Bangsamoro.

Di samping mengakui cabaran yang akan wujud, beliau tetap yakin di bawah kepimpinan Presiden Duterte dan kegigihan Malaysia sebagai pengantara yang ikhlas, era pembangunan serta kemakmuran di wilayah selatan Filipina dapat dicapai.

Tag: [Najib Razak](#), [Bangsamoro](#), [Malaysia](#), [Filipina](#), [perjanjian damai](#)

© 2016 Astro Awani Network Sdn. Bhd. (535275-D) All Rights Reserved.

Source: <http://www.astroawani.com/berita-malaysia/malaysia-terus-komited-kepada-perjanjian-perdamaian-bangsamoro-113891>